



Na osnovu člana 17. stav 2. i člana 44. stav 1. Zakona o Visokom sudskom i tužilačkom vijeću Bosne i Hercegovine („Službeni glasnik Bosne i Hercegovine“, br. 25/04, 93/05, 48/07, 15/08, 63/23, 9/24 i 50/24), a u vezi sa članom 61a. i 62. Poslovnika Visokog sudskog i tužilačkog vijeća Bosne i Hercegovine („Službeni glasnik Bosne i Hercegovine“, br. 55/13, 96/13, 46/14, 61/14, 78/14, 27/15, 46/15, 93/16, 48/17, 88/17, 41/18, 64/18, 12/21, 26/21, 35/21, 68/21, 1/22, 26/23, 83/23, 9/24, 27/24 i 72/24), Visoko sudsko i tužilačko vijeće Bosne i Hercegovine (u daljem tekstu: Vijeće), u sastavu tužilac Sanin Bogunić, predsjednik Vijeća, sudija Sanela Gorušanović - Butigan i sudija Velimir Ninković, potpredsjednici Vijeća, te sudija Izo Tankić, sudija Aleksandra Obradović, tužiteljica Bojana Jolović, tužiteljica Snježana Petković, sudija Sedin Idrizović, sudija Obren Bužanin, tužilac Saša Sarajlić, prof. dr. Džamna Vranić, advokat dr. sc. Davor Martinović, advokatica mr. Duška Bogojević i advokatica Elma Veleđar Arifagić, na sjednici održanoj 24. i 25.09.2025. godine, donijelo je

RJEŠENJE

o imenovanju zamjenika glavnog tužioca Okružnog javnog tužilaštva u Banjaluci

- I. Za zamjenika glavnog tužioca Okružnog javnog tužilaštva u Banjaluci imenuje se **Biljana Janković** na mandat od pet (5) godina.
- II. Datum stupanja na dužnost imenovane Vijeće će odrediti posebnom odlukom.

Obrazloženje

Na osnovu člana 36. Zakona o Visokom sudskom i tužilačkom vijeću Bosne i Hercegovine (u daljem tekstu: Zakon o VSTV-u BiH) i člana 33. i 34. Poslovnika Visokog sudskog i tužilačkog vijeća Bosne i Hercegovine (u daljem tekstu: Poslovnik VSTV-a BiH), Vijeće je na internet stranici dana 07.11.2024. godine objavilo javni konkurs pod brojem: 04-07-3-4035-1/2024, kojim je oglašena 1 (jedna) pozicija zamjenika glavnog tužioca Okružnog javnog tužilaštva u Banjaluci.

Nakon provedene konkursne procedure, nadležno podvijeće je u skladu sa članom 59b. st. (1), (2) i (4), a u vezi sa članom 61a. Poslovnika VSTV-a BiH izvršilo finalno rangiranje kandidata, te je Vijeću dostavilo rang listu kandidata sa obrazloženim prijedlogom za postupanje.

Razmatrajući zaključenu rang listu kandidata i utvrđeni broj bodova, kao rezultat ocjenjivanja svih kriterija propisanih Zakonom o VSTV-u BiH i Poslovnikom VSTV-a BiH, Vijeće je odlučilo da za poziciju zamjenika glavnog tužioca Okružnog javnog tužilaštva u Banjaluci imenuje kandidatkinju na rang listi pod rednim brojem 1 Biljanu Janković, srpske nacionalnosti, koja trenutno, a od 08.03.2004. godine, obavlja dužnost tužiteljice navedenog tužilaštva.

Kandidatkinja je od 2003. do 2004. godine obavljala dužnost tužiteljice u Osnovnom javnom tužilaštvu u Srpcu, od 1999. do 2003. godine obavljala je dužnost tužiteljice u Osnovnom javnom tužilaštvu u Gradišci, dok je poslove pripravnika obavljala u Osnovnom sudu u Gradišci u periodu od 1997. do 1999. godine.

Vijeće je ocijenilo da imenovana kandidatkinja u potpunosti ispunjava uslove za imenovanje propisane u članu 43. Zakona o Visokom sudskom i tužilačkom vijeću Bosne i Hercegovine.

Kriteriji stručnosti i sposobnosti pravne analize predložene kandidatkinje, koja već obavlja dužnost tužiteljice, utvrđeni su na osnovu ocjene rada za posljednje tri godine za koje je ocijenjena, i to za 2021.,

2022. i 2023. godinu, a računajući do dana isteka roka za podnošenje prijava po navedenom konkursu. Na osnovu navedenih ocjena rada za predmetni period, odnosno ocjena 5, 5 i 5, utvrđeno je da je kandidatkinja za navedene tri godine za koje je ocijenjena ostvarila prosjek od 5. Dakle, prema odredbama člana 56. stav 2. Poslovnika VSTV-a BiH, prosječnoj ocjeni rada kandidatkinje za prethodne tri godine, koja iznosi 5, dodijeljen je ekvivalentan broj bodova koji se koristi u konkursnoj proceduri od 100 bodova.

Kada je u pitanju broj ostvarenih bodova, Vijeće je imao u vidu da je predložena kandidatkinja u toku konkursne procedure, u pogledu bodova za kriterij stručnosti i sposobnosti pravne analize ostvarila ukupno 100 od mogućih 100 bodova, dok je na razgovoru pred nadležnom komisijom Vijeća u pogledu drugih kriterija ostvarila ukupno 29 od mogućih 30 bodova, što ju je u konačnici rangiralo na prvo mjesto rang liste kandidata sa ukupno ostvarenih 129 od mogućih 130 bodova.

Ostali kriteriji, koji se odnose na sposobnost kandidatkinje da odgovorno, nezavisno i nepristrasno obavlja funkciju za koju se prijavila, profesionalne nepristranosti i ugleda, te ponašanja van posla, dosadašnjeg radnog iskustva kandidatkinje, edukacije i usavršavanja, objavljivanja stručnih i naučnih radova, te drugih aktivnosti u struci, komunikativnosti, rukovodne vještine i iskustvo, te sposobnost upravljanja ljudskim potencijalima, utvrđeni su na razgovoru pred nadležnom komisijom Vijeća, kojom prilikom je svaki član komisije nezavisno bodovao kriterije, kako je to propisano u čl. 54., 54c., 54d., 54e. i 54f. Poslovnika VSTV-a BiH, pri čemu je kandidatkinja po tom osnovu u konačnici ostvarila ukupno 29 bodova. Konačan broj bodova koje je kandidatkinja ostvarila na razgovoru predstavlja prosjek zbira ocjena po kriterijima koji se ocjenjuju na razgovoru.

Pored ukupnog broja ostvarenih bodova, gdje je kandidatkinja u skladu sa članom 59a. stav (2) tačka a) ostvarila potreban uspjeh od najmanje 105 bodova, kako bi bila predložena i imenovana na poziciju zamjenice glavnog tužioca okružnog javnog tužilaštva, Vijeće je vodilo računa o okolnostima koje su relevantne za procjenu podobnosti kandidatkinje iz člana 48a. ovog poslovnika.

Vijeće je prilikom predlaganja navedene kandidatkinje ocijenilo da ne postoje okolnosti koje izazivaju sumnju u pogledu podobnosti za poziciju za koju se prijavila.

Prilikom imenovanja kandidatkinje, Vijeće je konstatovalo da nije moguće, shodno dosadašnjoj praksi, voditi računa o nacionalnom sastavu rukovodne strukture u ovom tužilaštvu, imajući u vidu da su svi prijavljeni kandidati, kao i aktuelni glavni tužilac i zamjenik glavnog tužioca, srpske nacionalnosti.

Uzimajući u obzir sve navedeno, Vijeće je ocijenilo da predložena kandidatkinja u potpunosti ispunjava zakonom propisane uslove, kao i druge kriterije koji se cijene prilikom izbora kandidata, kako bi bila imenovana za zamjenika glavnog tužioca Okružnog javnog tužilaštva u Banjaluci.

Kandidatkinja se na dužnost zamjenika glavnog tužioca imenuje na mandat od 5 (pet) godina, u skladu sa članom 31. stav (2) Zakona o VSTV-u BiH.

U pogledu dijela rješenja o stupanju na dužnost imenovane, isto se odgađa do okončanja dodatne provjere iz člana 86c. Zakona o VSTV-u BiH, a u vezi sa članom 19. stav (3) Pravilnika Visokog sudskog i tužilačkog vijeća Bosne i Hercegovine u vezi s izvještavanjem o imovini i interesima („Službeni glasnik BiH“ br. 20/24 i 57/24), odnosno do okončanja upravnog spora ukoliko je pokrenut protiv rješenja o imenovanju.

Ovo rješenje će biti objavljeno na internet stranici Vijeća, shodno članu 44. stav (1) Zakona o VSTV-u BiH i članu 62. stav (4) Poslovnika VSTV-a BiH, uz naznaku datuma objave od kojeg počinje teći rok za podnošenje tužbe.

Imajući u vidu sve iznesene razloge, Vijeće je odlučilo kao u izreci ovog rješenja.

JAVNO

Pouka o pravnom lijeku: Protiv ovog rješenja može se pokrenuti upravni spor pred Sudom Bosne i Hercegovine u roku od osam dana od dana objavljivanja rješenja o imenovanju na internet stranici Vijeća.

Broj: 04-07-3-3295-1/2025
Datum: 25.09.2025. godine



